

Cuira quinta cun 70 000 visitadras e visitaders

La 11avla Festa federala da la musica populara 2011 cumenza questa saira a Cuira

DA MARTIN CABALZAR

■ Questa fin d'emna ha lieu a Cuira la 11avla Festa federala da musica populara. A sa preschentar vegnan 300 furmazions cun passa 1300 musicantas e musicants. La festa populara, il cortegi, las represchentaziuns da valitaziun e la saira da gala che vegn emessa live a la Televisiun Svizra èn ils puncts culminants da la festa. Sper la musica populara tradiziunala ha il publicum era l'ocasiun da tadlar musica populara moderna, observar blers costumes, s'infurmar davart usits ed isanzas e degustar spezialitads culinaricas indigenas. La festa cumenza oz venderdi a las 17.00 e cuzza fin dumengia a las 18.00. Organizada vegn la Festa federala da musica populara per incumbensa da l'Associaziun svizra da musica populara che sa cumpona da las quatter regiuns Svizra nord-ost, Svizra centrala e Svizra nord-vest e Svizra romanda e che sa cumponan tut en tut da 22 secziuns..

Bain preparads per la festa

Tenor il president dil comité d'organiziun *Cipriano de Cardenas* «adempeschon las musicantas ed ils musicants en las represchentaziuns da valitaziun l'obligaziun da la concorrenza musicala e giandan alur ensemen cun il public la festa populara che ha lieu sin las piazzas da festa ed en la giassa dals ländlers». Sper la musica populara en las pli differentas variaziuns porscha il vast program accumpagnant era numerus elements da la folclora svizra. *Cipriano de Cardenas* è persvadi che la citad veglia pittoresca da Cuira vegn ad esser in ambient degn ed impressiunant per ina festa da musica populara. Las piazzas da festa e la giassa da ländlers sa chattan en il center da la citad veglia, las represchentaziuns da valitaziun han lieu en differents locals en la vischinanza. La saira da gala ha lieu en la Halla da la citad en il «Welschdörfli» ed il cortegi maina tras la citad veglia. Gia a la staziun vegnan beneventads ils giasts ed accumpagnads cun musica tras la Via



Cun produziuns da musica populara fitg variontas quintan ils organisaturs da pudair pledantar in grond publicum a la Festa federala da musica populara che ha lieu questa fin d'emna a Cuira.

FOTO TH. GSTÜHL

dalla staziun fin en la citad veglia. En il «Stadtgarten» èn planisadas activitads da la musica populara pli giuvna. Il cortegi cun l'act festiv uffizial ha lieu la dumengia, la gala la sonda saira. Las represchentaziuns da valitaziun entschavian gia venderdi e cuzzan fin dumengia.

Concerts e festa populara

Suenter ils concerts avant la giuria vegnan ils musicants a sa maschadar cun il pievel da festa en la «Ländlergasse» sco er en las tendas da festa nua ch'i dat musica populara e purschidas culinaricas a discretion. E quai venderdi e sonda notg fin a las 02.00. La festa sin las piazzas prin-

cipalas che sa chattan ad Arcas, Kornplatz e Nikolaihof sco era sin las piazzas secundaras al Martinsplatz ed Ochsenplatz entscheivan oz a las 17.00. Sonda e dumengia cumenza la festa gia a las 08.00.

La sonda sa mesiran sin la piazza Arcas ils finalists da la concorrenza da folclora da giuvenils e quai en las categorias jodel e musica populara cun mintgamai 5 furmazions. Radio DRS 1 e DRS Musikwelle vegnan a rapportar live. A las 16.30 vegn surdada la bandiera centrala.

Gala a la televisiun cun superlativs

La sonda saira a las 20.50 san ins perse-

quitar a la Televisiun Svizra SF la gala «Viva la musica populara» cun radund 400 cooperaturs live ord la halla da la citad da Cuira. L'emissiun directa che vegn moderada da *Kurt Zurfluh* ed *Isabella Wieland* dat in tagl variont tras la musica populara da la Svizra cun inscenaziuns sorprendentas e betg usitadas. L'emissiun vegn preschentada sco parada attractiva da musica populara e vul era pledantar personas che na s'interesschan betg a priori per quest gener da musica.

Messa da jodel e cortegi

Il punct culminant da la dumengia è l'act festiv cun allocuziuns da cussegliera fe-

derala *Eveline Widmer-Schlumpf*, dal president da la regenza grischuna *Martin Schmid* e dal president da la citad da Cuira *Christian Boner*. Ina attracziun speziala èn la messa da jodel sco er il cortegi da festa cun passa 40 gruppas cun radund 900 participants or da l'entira Svizra. Durant l'entira festa preschenta RadioTelevisiun Svizra Rumantscha sin la piazza da S. Martin passa 60 furmazions e surdat a quellas silsuenter in disc compact cun lur produziuns.

Discurs al podi e vernissascha da cudeschs

La sonda a las 11.00 envida l'Associaziun svizra per la musica populara ad in discurs da podi che stat sut il titel: «Tge sort da musica populara manjain nus?». Prominentas represchentants da la musica populara discuteschan en la chasa da la citad davart l'avegnir da la musica populara da la Svizra. Ulteriuras spezialitads en il program da festa èn la vernissascha dal cudesch cun la biografia da *Josias Jenny* u il concert «Das khunnt guat» cun *Flurin Caviezel* e «Stelser Buaba» en la baselgia Regula. Plinavant porschan 5 ustarias da ländler en la citad veglia in agen program da musica, la «Bierhalla» è schizunt averta di e notg.

Budget dad 1,89 milliuns

Tenor il parsura dal comité d'organiziun munta il budget per questa gronda festa da musica ad 1,89 milliuns. La mesadad da quels custs vegn curclada dal chantun Grischun, da la citad da Cuira e da sponsurs privats. Il rest duai vegnir curclà en cumparts gulivas da las entradas da la restauraziun da festa e da la vendita dals signets da festa che custan 7 francs. Cun questa mudesta taxa han ins l'ocasiun da visitar prest 200 produziuns da musica populara sin differentas piazzas ed assister al cortegi cun 41 gruppas e radund 900 participants. Tgi che vul asisster en ils sis locals da concert a radund 300 curtas produziuns da concorrenza (inclus cudesch da festa) paja 35 francs per tuts trais dis.